



Peter Olsen
Inatsisartuni ilaasortaq

§ 37 naapertorlugu apeqqtunut nr. 2017/087 ungasianiit kiassanermut aamma ungasianiit kiassanermut nunap assingi pillugit akissut

02-03-2017
Sags nr. 2017-3602

Inatsisartut suleriaasianni § 37, stk. 1 naapertorlugu ungasianiit kiassanermut aamma ungasianiit kiassanermut nunap assingi pillugit apeqquteqarputit. Apeqqutit uanga susassaqarfinnut akisassanngortinneqarsimapput.

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

- 1. § 37 aqqutigalugu apeqquteqaat 2015-meersumi nr. 210-mi ima ilaatigut akissuteqartoqarsimavoq: "Assersuutigalugu Nukissiorfiit illoqarfinni annerni ungasianiit kiassanermut nunap assinganik inaarsaapput" Suliaq sumummita killippa? Nammassereerpa agguanneqareerlunilu?**

a. Naammassereerlunilu agguanneqareersimappat, taava qanoq atorreqarpa?

Akissut:

Nukissiorfiit assinik suliaqartarput kiassarnissamut periarfissanik takutitsisunik, illoqarfinni anginerusuni ungasissumiit kiassaasoqarsinnaanersoq, innaallagissamit aalajangersimasumik kiassaasoqarsinnaanersoq aamma innaallagissamit kiassanermik unitsinneqarsinnaasumik sumi peqarnermoq pillugu. Ungasissumiit kiassanermut nunap assingi taamaattut Nukissiorfiit iluanni ulluinnarni atorreqartuupput, assersuutigalugu sullitaniit saaffiginnittoqaraangat akissutini, Nukissiorfiit ingerlatsineranni kiassaariaatsit suut sumiiffinni qanoq ittuni neqeroortugineqartanersut pillugit. Tamatuma saniatigut assit taakkua atorreqartarput nammineq pilersarusiornermi kiassanermik atortunik taarsiisarnerni annertusaasarnernilu.

Assit aamma soqutiginarsinnaapput avataani suleqatigisanut, soorlu sullitanut namminersortunut, kommuninut aamma suliffeqarfinnut. Taamaattumillu assit taakkua Nukissiorfiit quppersagaanni takuneqarsinnaalissapput, suliarineqarnerisa ilutigisaanik uani: <https://www.nukissiorfiit.gl/business-relations/fjernvarme/opvarmning-nuuk/?lang=da>

Killiffik tassaavoq assit Nuummut, Ilulissanut, Qaqortumut, Aasiannut, Qasigiannuanut aamma Sisimiunut tamanut takusassiarineqalereereri. Ingerlaavartumillu malinnaatitsisoqarpoq, nunap assingilu paasissutissani tatiginartunik katersineq ilutigalugu paasissutissanik immerneqartarlutik.

- 2. § 37 aqqutigalugu apeqquteqaammi 2017 nr. 035-mi ilaatigut ima akissuteqartoqarpoq apeqqtut nr. 2-ip ataani: "Nukissiorfiit ingerlaavartumik ungasianiit kiassaateqarfinnik inerisaapput, sullitat ungasianiit kiassanermut ilanngunnissaannut kaammartortarlugit, kiisalu ikuallaasarfinniit kissamik atorluannissaq pillugu kommunit suleqatigalugit" Taava apeqqtut: Inerisaaneq**

**sumut killippa? a. 2013-miit ullumikkumut nutaat ungasianiit
kiassarneqalernissamut qassit attavilersorneqarpat?**

Akissut:

Nukissiorfinni sulii pingaartilluinnarlugu nalilersorneqarpoq qularnaassallugu kiaap sinneruttup innaallagissionermiit aamma ikuallaavinni ikuallaanermiit pitsaanerpaamik iluaqutigineqarnissaa, aammalu erngup nukinganit nukissiuuteqarfinni nukik sinneruttoq innaallagialu atorlugu kiassaanermi iluaqutigineqassasoq. Nukissiorfiit ukiut tamaasa malunnaatilinnik annertuunillu aningaasaliissuteqartarput ungasissumiit kiassaanerup aamma innaallagissap kiassaanermi iluaqutigineqarneri annertusarniarlugit.

Nukissiorfiit ukiuni kingullerni pingasuni katillugit 33,5 mio. kr.-nik aningaasaliissuteqarput ungasissumiit kiassaanermi attaveqaatinut. Taakkua tassaapput Qaqortumi 5 mio. kr.-t Nuummi 16 mio. kr.-t, Maniitsumi 1,3 mio. kr.-t, Sisimiuni 9 mio. kr.-t aamma Aasianni 2,1 mio. kr.-nik aningaasaliinerit. Piffissami matumani nutaanik aningaasaliissuteqarpoq ungasissumiit kiassaanermut ataatsimut 43 mio. kr.-t missaannik annertussuseqartunik. Nukissiorfiillu naatsorsuutigaat suliniutit piffissami pilersaarutaasumi naammassineqarnissaat.

Innaallagissamik kiassaanermut atatillugu aningaasaliisoqarpoq innaallagissap aqquataasa nukittunerulersinnissaannut, tasaanilu ilaatigut qularnaarniarneqarluni sullitat amerlanerusut innaallagissamit kiassaanermik unitsinneqarsinnaasumik neqeroorfigineqarnissaat. Ilulissani erngup nukinganik nukissiuuteqarfimmuut atatillugu assersuutigalugu 60 mio. kr.-nik aningaasaliisoqarpoq innaallagissap aqquataanut aamma innaallagialu atorlugu kiassaassutinut. Nuummi pilersinneqarnikuuvoq 60 kV-net 160 mio. kr.-t missaat atorlugit, Qorlortorsuarmilu imermik nukissiornermi atugassamik ungalut annertusineqarnerisigut Narsami aningaasaliisoqarpoq 30 mio. kr.-t missaannik innaallagissap aqquataanut innaallagissamik kiassakkat amerlineqarsinnaanerannut atasumik.

Ungasissumiit kiassarneqartut sullitat malunnaatilimmik amerleriarsimapput. Januar 2017-imi Nukissiorfiit akiligassiissutinik fakturanik ungasissumiit kiassaanermut 1800 -nik nassiussipput. Januar 2013-imi kisitsisit taakkua 1300-ut missaanniipput. Ungasissumiit kiassarneqartut sullitat amerleriaataat annerpaat Nuummi aamma Maniitsumi pisimapput, taakkunani ungasissumik kiassaanernut akiligassiissutit 450-it missaannik aamma 50-inik piffissami amerleriarsimammata. Kisitsisit taamaallaat ungasissumiit kiassakkanut tunngasuupput, innaallagissamik kiassakkat ilanngunnagit. Ilanngullugulu oqaatigineqassaaq kisitsisit illunik ungasissumiit kiassakkanik tamakkiisumik ersersitsinngitsut. Tamatumani pissutaavoq Nukissiorfiit blokkinut arlalinnut atatillugu ataatsimoortumik akiligassiisarmata, inissiaatileqatigiillu akiligassiissutinik suliareqqiisarlutik inissiani inigisanut ataasiakkaanut.

3. Ilulissani, Qasigianguni, Aasianni, Sisimiuni, Maniitsumi, Nuummi, Qaqortumilu nukik pilersinneqartoq atorineqanngitsoortorli kiassarnermut atorineqarsinnaagaluartoq qanoq annertugiva? (Ungasianit kiassarnermut aammalu innaallagissamit kiassarnermut tunngasoq)

Akissut:

Ataani tabelimi ersippoq illoqarfinni pineqartuni periarfissat qanoq ittuunersut, innaallagissiornermiit aamma ikuallaavinnit, kiisalu erngup nukinganit nukissiuuteqarfinniit innaallagissap sinneruttup innaallagissamit kiammik suliaqarnermut aqqissuussisinaanermi. Nalilersuinermi tunngavigineqarsimavoq annertussuseq taamaallaat iluaqutigineqassasoq pilersuisussaataitanermut unammilligassanik pilersitsiviunngitsumik.

Illoqarfik	Ungasissumiit kiassaaneq/kiak sinneruttoq	Innaallagissamik kiassaaneq matuneqarsinnaasoq
Ilulissat	Kiak sinneruttoq iluaqutigineqarpoq	5-12 MW
Qasigianguit	Iluaqutigineqartoq 0,5 MW -ip missaani	Erngup nukiliorfeqanngilaq
Aasiaat	Kiak sinneruttoq iluaqutigineqarpoq	Erngup nukiliorfeqanngilaq
Sisimiut	Kiak sinneruttoq iluaqutigineqarpoq	Kiammik iluaqutigineqanngitsumik soqanngilaq
Maniitsoq	Kiak sinneruttut pitsaanerpaamik iluaqutigineqarpoq. Eqqakkanut ikuallaaveqarmat aasap qaammataani iluaqutigineqartumik peqarpoq 0,5 MW-imik.	Erngup nukiliorfeqanngilaq
Nuuk	Suliniutinik pilersaarusiortoqarpoq ikuallaavimmiit kiaap iluaqutigineqanngitsup atorineqalernissaanut. Tamannalu pissaaq Nuussuup aamma Nuup ungasissumiit kiassaarnermut atortorissaarutaasa ataatsimut aqqissuunnerisigut.	Aasap qaammataani iluaqutigineqanngitsooq 15 MW
Qaqortoq	Kiak sinneruttoq iluaqutigineqarpoq	Maanna iluaqutigineqanngitsumik soqanngilaq. Imermik nukissiornermi atugassamik katersiviup annertunerulersinneratigut nukimmik annerusumik peqalersinnaavoq innaallagissap kiammik nioqqutissiornermi illoqarfimmi

		atornissaanut periarfissiisumik.
--	--	----------------------------------

4. Illoqarfinni qulaani pineqartuni ungasianiit imaluunniit innaallagissamit kiassarnermut attavilersorneqarsimangissuseq qanoq annertugiva? Illoqarfiup immikkoortua qanoq annertugisoq suli attavilersorneqarsimangila?

Akissut:

Ataani tabelimi ersipput missingersuusiak ungasissumiit kiassarnermut aamma innaallagissamik kiassanermut illoqarfinni pineqartuni. Tabeli Nukissiorfiit januarimi 2017 akiligassiisutini fakturanik suliaqarneranneerpoq. Soorlu apeqqummut 2-mut akissummi eqqaaneqartoq kisitsisit illukkaartumik ersersitsingillat. Tamatumani ilaatigut pissutaavoq Nukissiorfiit blokkinit arlalinnut atatillugu ataatsimoortumik akiligassiisarmata, inissiaatileqatigiillu akiligassiisutini suliareqqiisarlutik inissiani inigisanut ataasiakkaanut.

By	Illut 2017-imi Naatsorsueqqis-saartarfik naapertorlugu	Ungasissumiit kiassakat amerlassusaat	Innaallagissamik kiassakat
Ilulissat	1736	85	36
Qasigiannugit	446	25	-
Aasiaat	1335	35	-
Sisimiut	2179	77	36
Maniitsoq	991	125	-
Nuuk	7381	1207	2590
Qaqortoq	1294	151	1

5. Apeqqut 2-mi taamatut ullumikkut suli attavilersorneqarsimangitsut attavilersorneqassagaluarpata taava attavilersuineq tamanna nunatta karsiarnut qanoq naleqassagaluarpa?

Nukissiorfiit ingerlaavartumik suliniutip imminut akilersinnaassusia nalilersortarpaat, ungasissumiit kiassakat aamma innaallagialu atorlugit kiassakat ilaqqissinnaanerit atatillugu. Ataatsimoortumik nalilersuinermit soqanngilaq periarfissanik iluaquteqarnermut atatillugu apeqqummi 2-mi eqqaaneqartutut.

Nukissiorfiit assersuutitut pingaarnertut aningaasartuutini nalilersuinermit suliaqarsimapput ilulissani, Nuummi aamma Narsami illoqatigiiaat ullumikkut ungasissumiit kiassagaangitsut imaluunniit innaallagissamik kiassagaangitsut eqqarsaatigalugit. Naatsorsuinerit taakkua naapertorlugit pisariaqassaaq aningaasaliinissaq illoqarfinni taakkunani pingasuni 100 mio. kr.-t missaannik. Oqaatigineqassaarlu ungasissumiit kiassanermut ilannguttarneq ilaannakuusumik

atuisunit akilerneqartarmat, naatsorsorneqartarlunilu atuinissamut missingersuutit aamma pilersitsinermi aningaasartuutit tunngavigalugit. 100 mio. kr.-nit eqqaaneqartunit 80 mio. kr.-t missaat sullitanit nutaanit akilerneqassasut, sinnerilu 20 mio. kr.-t Nukissiorfinnit. Naatsorsuutaasarpog akilersuisarneq ukiunik 5-inik sivilissusilik. Suliniutit ataasiakkaat nalilersoqqinneqaaqartarput aalajangertoqanginnerani piviusunngortinneqassanersut.

6. Taamatut attavilersuineq siunissamut isigaluni imminut akilersinnaasutut Naalakkersuisut isumaqarpat?

Akissut:

Apeqquummut 5-imut akissummut innersuussisoqassaaq. Nukissiorfiit suliniutinik piviusunngortitsisarput suliniutit pineqartut imminut akilersinnaaneri erseraangata, pissutsillu allat piviusunngortitsinnginnissamik ersersitsinngikkaangata.

7. Taamatut attavilersuineq ukiut qassit qaanngiuppata imminut akilersinnaalissagaluarpa?

Akissut:

Apeqqutinut 5 aamma 6-imut akissutinut innersuussisoqassaaq. Nukissiorfiit ungasissumiit kiassaanermut aqqutinik nalikilliliisarnerat ukiunik 25-nik sivilissusiligaasarpog. Siuliani eqqaaneqartutut aningaasartuutinik naatsorsuinerugallartut takutippaat Ilulissani, Nuummi aamma Narsami utertitsilluni akilersuineq ukiut 5-it inorlugit sivilissuseqartartoq.

Inussiarnersumik inuulluaqqusillunga

Med venlig hilsen



Vittus Qujaukitsoq

INUIT ATAQATIGIIT

Inatsisartuni



Aasiaat 15. februar 2017

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

- § 37 aqqutigalugu apeqquteqaat 2015-meersumi nr. 210-mi ima ilaatigut akissuteqartoqarsimavoq: "Assersuutigalugu Nukissiorfiit illoqarfinni annerni ungasianiit kiassernermut nunap assinganik inaarsaapput" Suliaq sumummita killippa? Nammassereerpa agguanneqareerlunilu?**
 - Naammassereerlunilu agguanneqareersimappat, taava qanoq atorreqarpa?**
- § 37 aqqutigalugu apeqquteqaammi 2017 nr. 035-mi ilaatigut ima akissuteqartoqarpoq apeqqut nr. 2-ip ataani: "Nukissiorfiit ingerlaavartumik ungasianiit kiassaateqarfinnik inerisaapput, sullitat ungasianiit kiassarnermut ilanngunnissaannut kaammartortarlugit, kiisalu ikuaallaasarfinniit kissamik atorluuanissaq pillugu kommunit suleqatigalugit" Taava apeqqut: Inerisaaneq sumut killippa?**
 - 2013-miit ullumikkumut nutaat ungasianiit kiassarneqalernissamut qassit attavilersorneqarpat?**
- Ilulissani, Qasigiannuni, Aasianni, Sisimiuni, Maniitsumi, Nuummi, Qaqortumilu nukik pilersinneqartoq atorreqanngitsoortorli kiassarnermut atorreqarsinnaagaluartoq qanoq annertugiva? (Ungasianit kiassarnermut aammalu innaallagissamit kiassarnermut tunngasoq)**
- Illoqarfinni qulaani pineqartuni ungasianiit imaluunniit innaallagissamit kiassarnermut attavilersorneqarsimannngissuseq qanoq annertugiva? Illoqarfiup immikkoortua qanoq annertugisoq suli attavilersorneqarsimannngila?**
- Apeqqut 2-mi taamatut ullumikkut suli attavilersorneqarsimannngitsut attavilersorneqassagaluarpata taava attavilersuineq tamanna nunatta karsiarnut qanoq naleqassagaluarpa?**
- Taamatut attavilersuineq siunissamut isigaluni imminut akilersinnaasutut Naalakkersuisut isumaqarpat?**
- Taamatut attavilersuineq ukiut qassit qaanngiuppata imminut akilersinnaalissagaluarpa?**

(Inatsisartuni ilaasortaq Peter Olsen, Inuit Ataqatigiit)

Tunngavilersuut

Nukiup pilersinneqartup tamakkiisumik atorreqarsinnaalernissaa pillugu anguniagaqartuartaqarpuq, suliniuteqartuartaqarpuqullu. Aporfiusinnaasullu tamaasa qulaajarlugillu naggiussiortariaqarpat atorluualersinnaanissarput aqqutissiukkumallutigu.

Tamanna ilaatigut siunertariaralugu qanittukkut § 37 aqputigalugu apeqquteqaateqarpunga apeqquteqaatigalugu akineqaqqammerpoq, apeqquteqaatigalugu normulerneqarsimalluni imatut: nr.035/2017.

Akissuteqaataasunut qujavunga. Taamattoq apeqput nr. 6-imut tunngatillugu akissutigineqartoq naammaginangitsut isigaara.

Naatsumik oqaatigalugu akissutaasumi oqariartuutigineqarpoq illoqarfinni qulaani pineqartuni taamatut ungasianit aammalu innaallagissamit kiassarneq atorneqartoq.

Tamanna eqqortortaqarpoq, kisianni aamma nalunngilarput illoqarfinni pineqartuni illoqarfiit immikoortortaasa ilaannaani taamaallaat taamatut periarfissaqartoqartoq, illoqarfiillu immikoortuisa ilarujussuani ungasianiit innaallagissamiillu kiassarneqarnissamut periarfissaqartoqanngitsoq, attavilersuisoqarsimannginnera pissutaalluni.

Akissuteqaat siulleq ersarluppoq, taamaattumik sukumiinerusumik - ersarinnerusumillu akissuteqartoqarnissa siunertaralugu matumuuna apeqquteqaammik nassiusseqqippunga.

Illoqarfinni qulaani pineqartuni, ullumikkut taamatut sulii attavilersorneqarsimanngissuseq qanoq annertuginersoq, attavilersuisoqassappallu qanoq nunatta karsianut qanoq naleqassanersoq paaserusuppara.

Taamatut tunngavilersuuteqarlunga matumuuna apeqquteqaatikka ingerlateqqippakka.

Kissaatigaaralu apeqquteqaatima ullut qulit qaanngiutinnagit akineqarnissaa.